

# "Safe-Sex?"

Diesinku aña pasá sèks fuera di matrimonio tabata un konsepto basta aseptá den nos komunidad. Pa motibu di e invenshon nobo, "de pil," hende muhé por a gosa di sèks sin temor di sali na estado. Protesta kontra sèks deskabeyá tabata minimal. E impreshon tabata ku antibiótikanan preskribí pa médikonan lo solushoná tur problema ku malesa veneriko por presentá.

Anto AIDS a aparesé riba e esena. Esnan ku tabata seksualmente aktivo a haña un susto formal. Un di nan partnernan seksual por tabatin e viro HIV for di kua nan por kontagiá AIDS? AIDS, morto sigur, a sagudí nos komunidad.

Ma atrobe ingeniosidat di hende a reskatá nos ku un solushon maravioso ku garantisá protekshon mientras nos a sigui ku nos enkuentronan seksual. E maravia aki, barata i fasil pa usa, a wòrdu promové den nos komunidad boneriano. Asta a instalá mashin na varios sitio pa fasilidat kumpramentu di e "bendishon" aki. Nos a wòrdu indòktriná ku un hòmber responsabel lo us'é ora e subi kama ku su yùfrou, i e mucha muhé sabí lo kana ku né den tas por si en kaso e mener no tin. Maske ta rekomendabel pa limitá bo partnernan seksual, no tin nodi di legumai aventura immoral, nos a wòrdu informá! Dal bai i gosa sèks, pasobra e bendita kondom ta garantisá "safe sex" i "safe-sex" ta e solushon pa AIDS.

Ma warda un ratu! E faktonan ta proba ku e "blas" chikitu di latèks ta un protekshon *sigur* kontra AIDS? Un kondom por garantisá "safe-sex?" Segun e revista *Family Planning Perspectives*, ora ta usa kondom pa preveni embaraso, e porsentahe di fayó den un aña a subi pa 15,7%. Un estudio di muhénan soltera a haña ku anualmente e kondom sa faya 36,3% komo prevenshon di embaraso. Kondomnan no ta asina efektivo pa preveni embaraso manera tabata pensá.

Ta notabel ku un muhé por sali na estado solamente un òf dos dia pa luna. Ma esnan ku ta usa kondom komo protekshon kontra AIDS mester kòrda ku AIDS por wòrdu kontagiá 365 dia pa aña. Si kondom ta faya asina tantu komo un antikonseptiko, e frakaso lo ta muchu mas tantu komo un protekshon kontra malesa. Un persona por gosa 50 aventura seksual "proteha" ma di 51 biaha ku un deskuido chikitu tin un interkambio di vironan i bakteria. Un pifia so ta sufisiente pa kontagiá AIDS. Den un instante, ora pashon a dominá, e hoben a kontagiá un bida di doló i asta morto. Kuantu balor e momentu di plaser tin awor?

Ademas, e kondom no ta un protekshon efektivo kontra malesa. Investigador nan a deskubrí burakunan di grandura di 5 mikron ku a penetrá e densidat di hanskunnan di latèks ku médikonan ta usa pa operá, e mesun material for di kua kondomnan ta trahá. E viro HIV ta midi solamente 0,1 mikron--50 bes mas chikitu Un estudio di parehanan kasá ku un partner tabata portadó di e viro HIV a haña ku dentro di 1½ aña un den seis (17%) di e partnernan salù a kontagiá e viro usando kondom. Ku evidencia asina, ken ku tin su sanu huisio lo konfia un kondom pa protehá su bida? Na un konferensia 800 eksperto di sèks a wòrdu puntrá kuantu di nan lo konfia un kondom pa protehá nan durante relashon seksual ku un persona ku nan sa ta HIV positivo. Ningun tabata dispuesto di hisa man. Dikon anto nos si ta despuesto pa enkurashá nos yunan presioso pa usa kondom?

Ku kondom ta garantisá "safe-sex" ta un mentira! Tin solamente un bèrdadero plan pa protekshon kontra AIDS: apstené di tur relashon seksual promé ku matrimonio, kasa ku un persona ku no ta infektá, i keda fiel na n'é bida largu. E solushon ei ta masha simpel, masha efektivo, pero no mashá popular. E no ta gustá pasobra hende ke sasia nan deseonan seksual manera nan ta haña ta bon.

Ma nos Kreador sa ku puresa moral ta e úniko prevenshon i solushon pa AIDS. Pesei den Su amor pa hende El a duna mandamentunan pa nos bienestar: "Apstené boso di fornikashon (tur immoralidat seksual)" (1 Tesalonisensenan 4:3). "Laga bida kasá sea respetá pa tur i kama sin mancha; ma fornikadónan i kibradónan di matrimonio (adulterio) Dios lo husga nan" (Hebreonan 13:4). Nos ta kosechá e fruta marga ku nos mes a planta. Ta tempu pa nos stòp di gaña nos mes ku kondom ta e solushon pa AIDS. Ta tempu pa nos skohe Dios Su solushon: apstinensia te matrimonio; fieldat den matrimonio!